

Thursday, September 18, 2025

Time - 2:30pm

MEDI

Mizorama kutkawih eizawna leh kutthemthiamna tih hmasawna tur atan Mizoram Entrepreneurship Development Institute (MEDI) din tuma hmalak a ni. Vawiin khan Entrepreneurship Development Institute of India Director General Dr. Sunil Shukla chuan Chief Minister Pu Lalduhoma chu a pisa ah kawmin Mizoram Entrepreneurship Development Institute (MEDI) din dan tur a sawipui a, Inkawmna ah hian Chief Minister chuan MEDI in rawtna hrang hrang an neih chu a huamchin a zauvin department kaihnhawih a ngah hle a ti a, inrawnkhawmna zau zawk neih a tul dawn avangin Coordination Committee din a, chak taka bawhzui an tum dawn tih a sawi.

Dr. Sunil Shukla chuan Mizoram sorkarin hmunhma an pek theih chuan CSR Fund an zawn khawm leh Central Scheme atanga fund awm theite hmangin kutkawih eizawna leh kutthemthiamna lama hmeichhiate leh zirlai naupangte tan zirna in tha tak Mizoram Entrepreneurship Development Institute (MEDI) an din thei dawn a ti a, A tir lam kum 5 chhungin Entrepreneurship te, Skill training te, start-up te, incubation leh mentoring lam an kalpui dawn tih sawiin Kum 8 vel chhunga mahnia Campus nei theia din an tum tur thu a sawi a ni.

**DRUGS SEIZURE**

Assam Rifles duty chuan an thudawn bawhzuiin nimin khan Champhai District-a Zote khua ah Metamphetamine tam tham tak an man a, tualchhunga hralhna rate atanga chhutin cheng vaibelchhe 102 leh nuai 65 man hu a ni.

Assam Rifles hnen atanga thudawn danin duty te hian ramri kana ruihhlo tawlh tum hi lo nangchingin ruihhlo keng tu pa hian a thil ken lai chu dahin ramhnuai lamah a tlanchhia a, a thil kalsan tak an enchian chuan Ruihhlo thahnem tak Methamphetamine Tablet kg 34 leh gram 200 chuang alo awm a, hei hi cheng vaibelchhe 102 leh nuai 65 man hu nia chhut niin ruihhlo man hi Champhai District Excise and Narcotics Department hnenah hlan a ni.

Nimin vek khan Assam Rifles leh Territorial Army, Aizawl tangkawp chuan an thudawn bawhzuiin Zemabawk ah Heroin gram 12 an man a, a neitu nia puh Lalchhuanmawia (kum 25) Champhai Zote pawh man nghal niin ruihhlo an man sak hlut zawng hi cheng nuai 8 sing 4 a ni a, Ruihhlo hi Excise and Narcotics, Aizawl kutah hlan nghal a ni bawk.

**CM**

Chief Minister Pu Lalduhoma'n Mizorama service hrang hrang inkar zau lutuk chu pawl a tih thu sawiin service inelna chu tihbo a duh thu a sawi.

Chief Minister hian nimin khan Mizoram Civil Services Combined Competitive Exam-a tling, Administrative Training Institute-a Combined Foundation Course kal mek, MCS, MFAS leh MIS officers te CM Conference Hall-ah a kawm a, an sawrkar hnua sawrkar hnathawk service zingah inelna tam lutuk chu sawrkar hna a chakloh pah tih sawiin Chief Minister chuan tihbo an duh a ti a, service a lut tharte chhawm lut lo turin a duh thu a sawi.

Pu Lalduhoma chuan sawrkar hnathawk an nih angin sawrkar apiang thawhpui thiam turin a chah a, hmasawna a kal tuan pah tih sawiin tuten emaw ruling mi leh sa an nihna changchawia thil diklo tih an tum chuan hlau loa hmachhawn ngam turin a chah bawk.

**EXOTIC ANIMAL**

Environment Forest and Climate Change hnuaia Wildlife Division chhinchhiah danin kum 2022 atanga kumin 2025 thlenga ramsa an awmna hmun himlo atanga chhanchhuah chuan 116 a tling tawh.

Wildlife division ten Runmawi palai an hrilh danin heng ramsa te hi mihring chenna bulhnai taka awm an ni hlawm a, ramsa chhanchhuah zingah hian rul chi hrang hrang bakah sava chi hrang hrangte, satel leh sa zaw thlengin an tel a. Wildlife division hotute chuan heng an ramsa chhanchhuah takte hi an dinhmun a zirin, a then Aizawl sa huanah an dah a, a then erawh chu ramhnuaiah an chhuah thung a ni.

Kum 2021 February ni 1 atanga thenawm ram Myanmar a buai hnua thil hrang hrang tawlh ruk hi a hluar hle a, Champhai Forest Division chuan ‘The Wildlife (Protection) Act -1972’ kalha ramsa tawlhruk hrang hrang thahnem tak an man tawh a, heng tawlhruk te hi ramchhung leh rampawn hmun hrang hranga thawncchhuah tur a ni.

Hetihlai hian Mizoram Police ten tun hnai kum 2018 atanga kum 2023 inkara ruihhlo leh dan phalh loh ramsa tawlhruk tam tham tak an halral chu World Book of Records ah a lang a, ramsa chi hrang hrang 600 dawn an man tawh a ni.



WATO TRUST PRESS CONF

WATO Trust buatsaihin October ni 17 khian Mizoramah Basketball inelna neih a ni dawn a, heta thiam zual thlanchhuah te chu Mizoram Territorial Army ah lakluh an ni ang.

He thu hi vawiina Aizawl Press Club-a thuthar thehdarhtute an kawmnaah sawiin, WATO Trust Business Strategist Asomi chuan WATO Trust chu khawvel pum huapa NGO a ni tih sawiin, India-a ruihhlo dona awareness programme bultanna atan Mizoram an thlang a ti a, October ni 14 khian a hawnna atan basketball match buatsaih a ni dawn a, October ni 17 ah Falkland Park ah Basketball inelna neih a ni dawn a, category pahnih Under-21 leh Senior Category a awm dawn a, player tha zual thlan chhuah te chuan pawisaifai an dawng dawn a, WATO Trust chuan one-year scholarship a pek dawn bakah Mizoram Territorial Army chuan player tha zual an lalut dawn bawk a, a duh apiang tan a thlawnin a in ziahluh theih a ni.



SEVA PARV

Mipui rawngbawl leh sorkar inrelbawl na tha tih thupui a hmangin Prime Minister Narendra Modi sorkarna hnuaiah kum kalta chhung khan hmasawwna kawng hrang hrangin kalpui a ni a.

Tun tum Seva Parv hunah chuan kuthnathawh lama hmasawwna hrang hrangte han tarlang ila.. kum kalta chhung khan agriculture lamah hmasawwna tam tak hmuh theih niin, thingtlang loneitute tan thlai thar chhuah leh hralh kawngah nasa takin loneitute hamthatna scheme hrang hrang – Pradhan Mantri Fasal Beema Yojna, Pradhan Mantri Krishi Seenchai Yojna, Agriculture infrastructure fund, Pradhan Mantri Kisan Samridhi Kendras, National Agriculture Market (e-NAM), hnuaiah te pek an ni a.

India chu thei, thlai leh hmuihmer thar chhuak tam ber niin, khawvel puma bawnghnute siam chhuak tam ber a ni.

